

O se tasi o finauga faaauau pea o lena i le faapogai o lelei ma leaga i le sootaga ma le Atua le Afua Mea. E iai lenei faasoa faapitoa mo le Eseta o lenei foi tausaga.



Itulau e 3

Lomiga Faapitoa o le Eseta

OLA

PULETINI A'OGA

Tofa tatala a Pola:

Fu'a o le faia'ina, komisi mo tagata uma ma le fili e tuua'i soo



Ia, malo lava le soifua manuia, i lenei vaiata o le Eseta ma le faamanatuga o le Toe Tu manumalo mai o lo tatou Alii.

Ia, ua valaauina a'u e faatonu o le puletini ou te sau i luma e vaai le ofisa. E faale maua ni avanoa i luma i le ofisa, o lea ou te faamalo atu i le faaeaea.

O lea ua official le mea, ua togi i fafo le fu'a a Ki ma lana vaega; manatua na ou fautua i ai e faapa'epa'e le pito i luga, e leai ni mamoe uli i le atunuu na'o mamoe papa'e. Ma le isi mea, a fesili poo mamoe poo le olopeleki o loo tausia lenei atunuu, e tasi a le tali, o mamoe. Sala ina faailoa le sao o mamoe. O le 'afu la lea, \$26 miliona ua goto uga i le moana, ae soia, mea sili ua maua ai tupe a na konekalate na faatinoina.

Ua afaatasi le Komisi o aia Tatau ma le SEN (vaega e tetee i le a'oa'oina o mataupu lotu i a'oga), e molia sa latou tagi faasaga i vaega o le tulafono o loo lagolagoina. Ua tatou vaai atu i le ata o le lumana'i, le ono lafoaiina o aso taua faamanatu e iai le Eseta, Kerisimasi. Maeu foi le lagalagamaa o nei tagata. O le fesili pe o se Komisi mo e le lolotu pe se Komisi mo tagata uma? Ia, tailo. O fea a gata ai?

Sa ou faitau i le faasoa lea i le Lelei ma le Leaga, ou te ta'utino atu o a'u le isi mafua'aga o le leaga. Ae taumafai lava e saili se malo mo lelei a o le'i uma le aso. Ioe, o tatou uma lava o uo a lelei. Faapefea? Pe a fautua atu lau paga ae e faalogo atu e sese, ona e fai atu lea, 'Hey, soso mai i le Moli. Ua e pogisa mai.'

Lelei—leaga—toe lelei toe leaga foi. Faatasi faalua faalava. Ua ta le iloa lava. Ai foi a tuua'i i le Big Bad Wolf.

Lafoa'iina a'oga a vaiaai ona o le sailiga mo le mea sili

Fai mai se lipoti a le Sunday Star Times, tuufaatasia e Marika Hill, ua faateteleina le aofa'i o fanau e le a'o'oga i a'oga a o latou vaiaai, ae aga'i atu i isi a'oga i fafo atu o a latou sone a'oga.

I le taimi nei ua sili atu le numera i se 80,000 ma o loo faapoopo pea.

Ua manino mai foi le mafua'aga, ina ua faatalanoa le tele o matua e a latou fanau, e sili atu a'oga i fafo atu ma taumamao i lo a'oga na e latalata mai i le fale.

O nei lava matua o loo finau mo a latou aia tatau, e filifili ai mo se lelei o a latou fanau. O i latou nei o loo saualuma i le tetee i le faiga o loo faasasa ai e le Matagaluega le a'o'oga o fanau i tua atu o a latou sone a'oga.

Ua latou taumafai foi e uia soo se auala e mafai ai ona talia a latou fanau i a'oga o loo naunau e faaulu ai. A le o tupe, o pasi maualuluga a fanau, e oo lava i le lipoti mai le foma'i e fesoasoani foi. Ua iai molimau o matua ua talapelo i tuatusi ina ia mafai ai ona ulufale a latou fanau i se a'oga fou.

Ma o le popolega e moni lava mo le malo ma le Matagaluega, afai e alu a'i faapea, e iu ina tula'i mai se faiga e le ese ma lena sa tupu i Aferika i Saute, i le va o le lanu pa'epa'e ma isi lanu. Mo



Foliga o le mea sili i le vaai a nisi matua, a'oga e a'o'oga ai fanau a tupu ma miliona; faatusa i povi pepeti ma mamoe taifulufulu

a'oga, o le va i tamaiti e tulaga ese le atamamai mai le to'atele. O le iuga, o le tula'i mai o se faiga sili ona faailogatagata, ma molia se fe'au sese i le to'atele o fanau a mea e maua le sili i le falea'oga taugata ma le pili taugata.

I Kalaiesetete e tasi mai le lima e auai atu i se a'oga i fafo o le sone, i Aukilani e 15 pasene o fanau e le auai i se a'oga i vaiaai e nonofo ai.

O le a taumafai e faaauau le faamatalaga o lenei lipoti a le Sunday Star Times i le isi lomiga a le OLA, e faailoa ai lagona o nisi o fanau ua omia i le va lea.



"Aua ne'i faaseseina oe Pole, e le o le a'oga ma le falea'oga, o le mea pa'epa'e lena e i lou ulu. O e malamalama?"

O le faafeiloa'i a manu



Ina ua faalogo manu o le vao ua faasatauro Iesu, ona lagona lea o lo latou faanoanoa tele. Ua ta'itasi a le ituaiga ma talanoa i le mea ua tupu.

O manuvaefa, o manu fetolofi, o manu felelei, o iniseti, ua latou faapotopoto ma talatalanoa, ma mafaufau fo'i.

A o le tupu o manu ua le manifo. “Alu vave se isi e logo isi ituaiga e o mai se'i fai le fonu. Fai i ai e fai le fonu a taeao iinei i le tutonu o le la. Aua ne'i le sau se isi. Fai i ai ua fai atu ai le tupu.”

Ona alu lea o le avefeau, ua ta'u atu le fe'au a le tupu o manu i isi ituaiga. Ua soo le vaomatua i le savaliga a le avefeau. Ua leai lava se tasi e le i oo i ai le fe'au a le tupu.

Ua oo i le aso e sosoo ai ona gasolo mai lea o ituaiga ta'itasi.

E faitau afe ma afe a le ituaiga. O povi, o solofanua, o serafi, o elefane, o taika ma pafalō—e leai se tasi na nofo. E faapena fo'i i ituaiga eseese o manu felelei, o manu lapopo'a, ma manu laiti ua latou o mai uma, ma ua lilofia ai uluulu o laau i lea vaega o le fogaeleele.

Ae le faitaulia fo'i le to'atele o le ituaiga o manu fetolofi ua auai mai i le fonu.

Sa iai manu mai Aferika, Europa, Asia, Amerika e oo lava i le Pasefika, ua potopoto uma mai e pei o se aiga e tasi. Ua latou maua le tala faanoanoa, ma o lea ua o mai uma ai.

Na tu i luga le tupu o manu, le leona o Kasana, ona filemu ai lea o le aufono ae faalologo uma.

“Ou te faafetai atu ia te outou uma. Faafetai le susu mai, a ua mafua ona ou valaau atu ona o le maliu o lo tatou tupu, o Iesu. O ananafi na fasiotia ai o ia e fitafita a Roma, i luga o le mauga e le mamao atu ma le nofoaga leneni.

“O lea ua ou manatu ai poo le a se mea tatou te fai e faailoa ai lo tatou fa'aaloalo i lo tatou tupu, o lē na faia i tatou uma. Ae faaali mai ni o outou finagalo . . .”

Na tu i luga le ta'ita'i manuki o

Seko ma saunoa loa, “Faafetai atu i lau afioga a le tupu mo le avanoa. Ae ua ou faalogo sa fai le tala a Iesu o ia e toe tu mai le oti.

I le aso tolu, o lona uiga, o taeao. O lo'u la manatu, filifili so tatou sui se to'atasi e alu e faafeiloa'i le Alii i le taimi e toe tu mai ai.”

Na alu a'e nei i luga le magamagagu ma le pisa o manu ina ua faalogoina lea faaaliga mai ia Seko.

“Lau afioga a le tupu,” o Seko lea, “a e finagalo i ai, ou te mana'o e fai a'u ma a outou auauna, ou te alu e faafeiloa'i Iesu i le taimi e toe tu mai ai. E mana'omia se failauga e pei o a'u e lelei le gutu,” o le upu lea a Seko ma ifoifo atu i le tupu.

“E le fia tilotilo mai Iesu i se manuki lē taele,” o le valaau mai lea a le luko o Ropina. Ae faaopopo mai i ai lana vaega ma isi fo'i ituaiga.

Ua tu a'e le tupu ma tu'itu'i lona tootoo.

“Tatou te le'i o mai iinei e lau ni pona o se isi. Talofa ia Iesu pe a faalogo mai i lo tatou vaivai tele . . .”

Na iloa atu e Kasana le ta'ita'i elefane o Kolemo o loo sisi i luga lona isu, ona fai atu lea, “Saunoa mai Kolemo.”

Na faaali le manatu o Kolemo faapea, e fetau lona alu e fai ma sui o manu. Talu ai o ia le manu pito lapo'a ma malualii, e tatau la ona alu auā o Iesu o le tupu e gata ai tupu.

E le'i uma lana tala ae alu a'e fo'i i luga le talagu o isi e ta'u mai le le fiafia.

E faapena ina ua uma ona faaali le manatu o le aeto o Semi. Fai mai Semi o lona ituaiga e aupito malolosi i manufeleele uma o le vao.

“Ua fetau le aeto e faafeiloa'ia le tula'i mai o Iesu mai le tuugamau,” o le upu lea a Semi i lona leo paū ma le taufaafefe.

“O le vaaiga i se aeto e lele i luga o le matagi ma ao pouliuli o le lagi, o le faatusa lena ua fetau ma le toe tu

manumalo o Iesu mai le oti.

“Tafēfē i se vaaiga. O le Alii ma a'u, o a'u ou te faapepepepe a'e i luga o le Alii,' o mafaufauga ia o le aeto mimita ma fefaloa'i ona apa'au.

Na faagasolo pea saunoaga o le fonu. Na malosi le finau a le lupe, ae faapea fo'i le gata, ae ina ua aumai le iuga, na matua faate'ia i latou uma.

“O lea ua tatou faalogologo uma i manatu ua faaaliga, ma o le a fai i ai la'u faaiuga,” o le tala lea a le tupu. “Ua tonu ia te a'u o le a avea le pepe e fai ma o tatou sui.”

“O la'u mafua'aga leneni. O outou uma lava o manu ua toto lima. Tou te fe'aina'i ma felamata'i. Tou te femitai ma fia maualuluga, o le mea lea ua le tatau ai ona outou faia lena fa'aaloalo maualuga.

“E oo fo'i ia te a'u le tupu o manu, ou te le fia soso atu i lena paia ma le mamalu.

“O le mea lea ua ou filifilia ai le pepe e fai mo tatou sui. O lona tala'aga e faatauvaa.

“E amata mai i se faamoega faaleiloga, sosoo ma se tama'i manu e ese lava mai isi uma, ae fanau mai ai se mea matagofie i le vaai.

“O le ata moni lea o Iesu le tupu. Na fanau mai i se nofoaga faatauvaa. Na saisaia e le pogisa o le tuugamau. Na faapea ona fili e le toe tu mai. A ua toe tu mai lava ia i le mana o le Atua Silisili, le Tupu o Tupu . . .”

Na lele le pepe i le vaveao o le aso na sosoo ai. Na taunuu i le Mauga o Kalevario a o le'i vivini toa o le taeao. Ona tu lea i luga o le maa lapotopoto na faamau ai le gutu o le tuugamau ma faatalitali.

I le isi itu o le maa se agelu o loo tu fo'i ma faatalitali.

Ona sau ai lea o le Alii i fafo. Ua tau lana vaai i le pepe. Ona fofola mai lea o ona lima faafeiloa'i.

Na lele atu le pepe ma tu i alofilima paia ua mātala. Ona mātala ai lea o ona fofoga i se 'ata, ma tepa a'e i le lagi.

Tusia Levi Tavita

Faasoa Faapitoa: Saunia e L. Tavita

Lelei ma Leaga i le fuafuaga a le Atua: Aisea e tutupu ai mea leaga i tagata lelei?

O le fesili lenei o augatupulaga, e tofua le tupulaga ma lana tali i ai. O le tali ta'uta'ua o loo i le Tusi Paia i le tusi a lopus. E le o se tali tuusa'o i le fesili a o se ta'utinoga o le faatuatua, e tineia ai le saga fesili, ae talia le moni: e iai mea e le oo i ai le malamalama faaletagata.

O le miga e fesili tainane le le malamalama o se faailoga o le talitonu faamaoni i Le e pule i le tagata, le ola ma le oti, lelei ma le leaga ma mea uma lava. Ma o lona tali o loo avea pea ma fu'a tualuga i le ola faatuatua o le to'atele, e le taulia pe o se Kerisiano, lutaia, Isalama poo se tasi taofi e talitonu i se Atua Pule e To'atasi.

Ae e lei faigofie ia lopus ona talia sea taofi, auā o lana vaai o lona a le lalolagi tuai, e leai se ataata i le Atua, auā o la o le Malamalama. Se'ia fetalai mai le Atua i totonu o le matagi, le faititili ma ta'utino ai lopus i sona iloa faatauavaa. Ma Elia i sona le malamalama, e pule le Atua i mea uma lava.

Ae e le uma le fesili pea o tupulaga, e le mou gofie taofi masani, le agaga tofotofu, aemaise le fanau ua a'oa'oina i tala i le alofa o le Atua, Lona mana e malolo ai ma'i. Le tama laitiiti e maua i le kanesa, o loo faatali le aso e oti ai, e fesili, 'fai mai foi.'

Auā afai e moni le mau e pule aoao le Atua, aisea e faataga ai pea e ia le leaga e pule i le lalolagi e ala i ma'i ma sauaga ma malaia faanatura? Aisea e le tali mai ai i le valaau a ona tagata mafatia? O fea sa iai o ia i le taimi o mafatiaga o fanau ma le faitau miliona lutaia na fano i le pule a Hitila ma lana vaega faaupufai? Le faitau miliona na fano i Kameposia 'ai lima o se faia'oga? Le faitau miliona na fano i pulega a Sitalini o Rusia? Saina i pulega a Mao? Ae a le faavalemalosi o se tupu i le fasiotiga o tama meamea a lutaia talu ai le sailiga o lona lava Alo e Herota? Aisea na le tu atu ai e tetee i le leaga auā na te mafaia lava?

Ae le faitaulia le aufaatuatua o feagai ma mafatiaga i aso ta'itasi, o loo musumusu leleoa mo se lavea'i? E faapefea ona faamatala le le magagana o se Atua Alofa i le taimi e sili le mana'omia ai? Faapefea ona finauina le sa'o ma le sese o le le aia o le Atua i tiga ma faanoanoaga o lana foafoaga, ae le lilo se mea i lana vaai? Le manuia o e leaga ma le malaia o e amiolelei?

A lulu tofotofoga ma ua le maumanatu le tagata i lona itula aupito pogisa, ona toe fesili lea i fesili tuai: O ai le Atua? O fea le Atua? Pe moni ana folafolaga? Pe moni ua maliliu le Atua e pei o le alaga e lei mamao atu, ina ua fesiligia e le lalolagi Lana pule i lona a Hitila ma taua e lua a le lalolagi?

O ni fesili e le tu mamao ma i tatou uma.



O ni masalo tatou te nonofo pea ma tatou i itula ta'itasi o le aso. A feagai ma leaga e tu mai i le mafaufau le Atua. A fetui ma lelei e vave ona fesoota'i lagona ma le lagi.

Ua iloga le matailoga o na fesili i lenei lava vaia a le taimi, a o aga'i ina tupu tele le leaga, le faateleina o taua ma maseiga i va o malo, le faafitauli o tagata sulufa'i, le oge ma le matelaina o le to'atele, le faauliulito ifo o suiga i le tau ma ona aafiaga mata'utia i le lalolagi, le faamata'u a tagata faamata'u i le saogalemu i soo se tulimanu, e mautinoa ua tele tala ia leaga i lo na o lelei.

O le tala i le Atua ma lana pule, ma lona le tali mai i le valaau i le taimi e moomia ai, o se mealilo i lo tatou poto. E manatu ai nisi lotu o fuafuaga a le Atua e le masu'esu'eina, e natia mai le poto su'esu'e o tagata. Afai e natia o lona uiga e tapu; o le tuaoi e le laasia, e le fesiligia i soo se tau.

Peitai o na tapu ua avea ma mea faalavelave i le faatumauina o Lona 'iai' ma avea pea o se tasi vaega taua i le olaga o tagata ma Lana foafoaga. Afai ua le toe manatu mai, pe i le gagana o oloa faatau, afai ua uma le aso e aoga ai, e au ina lafoaiina ma le toe manatu lona taua sa uluai iloa ai. O le uiga lea o le upu, ua maliliu le Atua, e pei ona talagu ai Europa e lei mamao atu.

E tai faapena se taofi o le alii faimataupu lotu o Spinoza; ua uma le taimi e aia ai le Atua Foafoa i lana foafoaga sa fai. Ona 'o lea, e le tatau ai ona toe faitaulia o ia i se tasi lava mea e tupu mai i lana foafoaga. Faaopoopo mai lea o isi e faapea, e mafua tiga o le olaga ona o le tagata lava ia; aisea e tuua'iina ai le leaga i le Atua ae meaane o le tofiga o Hitila na faia lava e tagata Siamani?

O le vavaega e le Mataisau o ia mai lana foafoaga o se pine faamau o lana amiotonu, faapea mai le finau; e avatu ai le pule i le tagata o se tausimea, e pei o le faataoto i le matai na ia tapena le fanua, ona avatu lea le pule i ana auauna e atia'e ai, ae alu e malaga. O le Atua ua malaga ae tuu atu le lalolagi i le tagata e pule ai. Aisea e tuua'iina ai fua i leaga e mafua i pulega a e na tuu e leoleo? A o le tasi lona faamatalaga.

O le isi e faapea mai e afua mai le lelei ma le leaga i le Atua lava. Afai o le Atua le faapogai o mea uma lava, o ia foi le tusitala o na mea uma lava.

E taulamua le Lotu lutaia i lona taofi. E manatu lutaia ua saga faamamafa e isi lotu se finauga o loo fai i le va o lelei ma leaga, ua tula'i mai ai se vavaega i mea lua, ae meane o le olaga e itugalua – muamua o lelei, e maua e ala i le faia o le finagalo o leova; lua o leaga, e mafua ona o le teena o lona finagalo – ma o se filifiliga sa'oloto e fai e le tagata lava ia.

Ae aisea le mafui'e ma le galulolo? O aga moni na tau le Foafoaga e le ma'alofia, ae iloa ai pe faape'i le tali atu i ai a le tagata i lona faatuatua i le Atua ma le alofa i le uso a tagata.

O Satani o le e faaosooso, e pei ona ia faia i le uluai tagata i le uluai faatoaga. E foliga e fai mai, e iai lana pitolaau e fai, e fesoota'i tonu i le va feagai o le tagata ma le Atua, poo lona faauigaga o lona va feagai. Pei o lana vaega i le tala ia lopus, e tatau ona iai se Faasala, se tasi e ese mai, o se loia e lu'iina le faamaoni o le tali atu a le tagata i lona va ma le Matai.

E lei agasala lopus a o feagai ma tofotofoga a le Faasala, tainane taumau pea i ona taofi tuai.

A o aga moni a le olaga e le tatau ona faafitia e pei ona molimau mai Puta le faia'oga a Asia. O le tiga e ala i le ma'i ma le olaga matua o mea moni na e ao ona tatou talia. E au i le ma'i e au i le vaivai. Ae faaopoopo mai le Saienisi, E tofua soo se mea e tupu ma sona faamatalaga e faamalalamalama ai. E ma'i se tasi i le kanesa ona o se sine leaga i le tala faasolo o se aiga; poo le faatalale i le tausiga o le ola maloloina. E tupu se faalavelave matuia ona o le faatamala faaletagata. I nei aso o le pule a le Saienisi i soo se vaega o le soifuaga, ua mafai nei ona faasaoina le Atua mai le tuua'iina pea i mea tutupu sa lilo mafuaaga i le vaai a e anamua.

Faaauau i le itulau e 4

Faaauau Faasoa:

I le tala ta'uta'ua ia lopus e lotolotoi ai lenei fesili ua avea ma a tatou autu. Aisea le tagata amiotonu le feagai ma tiga ma faigata o le olaga? E mafua ai se fesili e foliga e faafiaamiotonu, Aisea a'u le Atua? Aisea e le tupu ai i lo'u tuaoi lale e fai le leaga ma tafili saunoa i le olaga? E atagia i le fesili le fua faaleamiotonu sa soifua ai tagata i le taimi o lopus.

O le manatu sa laualuga i na tupulaga afai e te faia le finagalo o le Atua (tausii ana poloaiga, savali i le ala tonu), o le a faamanuia le Atua ia te oe ma lou aiga. O faamanuiaga e lata mai ma faaletino. A ua oo ina taia e le ma'i, satia ma luluina i puapuaga - e pei ona tupu ia lopus, ona fesaga'i lea ma se pogisa faaletaoi e le faigofie i le mafaufau faaletagata ona su'esu'eina.

E mafai ona faatusa le malaga faalefaatuatua a Isaraelu i lona a lopus i le va ma le Atua. Sa maualuga le talitonuga e le to'ilalo Isaraelu i se isi malo. Aisea? Auā e leai se isi e tu atu i le Malosi o le Atua o Iakopo. Sa faualuga i le malosi o pa o Ierusalem o loo puipui ai le paia o Isaraelu, ae na a? E lei tu i le malosi o Papelonía ma le ma'ema'ea o le pule a Roma.

Ae i lona taulotoaiga o le pogisa na fotupule ai nisi vaaiga, ma talia le faaiuga faigata ua tula'i mai. Ua tupu le manatu afai e pule tasi le Atua i mea uma, o loo silafia e ia lana mea o loo fai. Tuu ia le fesili poo fea e ofi mai ai le leaga i totonu o le lelei, poo fea e sau ai le lelei i totonu o le leaga. E tasi le puna le tusitala o mea uma – o le Atua.

E vave ona tatou maua sea fe'au mai le taumolimoli a le au fatusolo ma le aufaitaofi lotu. Auā o le sailiga o le tuaoi o lelei ma leaga o le sailiga lava lona i lona afuaga. Afai o le Atua o le Afuamea, o le Pogai e amata ma gata ai - ona vavala mai lea o se ata e pei ona finau mai le Lotu lutaia. E pei ona faaupuina e nisi fatusolo, ana leai le Atua po ua leai se Tiapolo, ana leai le tiga po ua leai se uiga i le ola, se faatupu manatu i le uiga o le fiafia moni, le faamoemoe ma le manuia e sui ai.

Ana leai le oti po ua leai se tapuaiga i se atua, se faamoemoe i se mea e sili atu. Ana leai le agasala po ua le iloa lelei atu e se isi foliga o le Atua. Ana leai se malosi faapoopo e leai se malosi taufeagai. Ana leai se pogisa po ua le mana'omia se Malamalama.

Ana leai se Fili po ua leai se taua, se tauiviga – po ua lofia tatou i le na'o lelei ma manuia ae faafitia ai le isi vaega o le fuafuaga poto a le Silisili Ese. E pei o

lenei, e iloa le auro i le afi, e iloa le alofa faamaoni i le mea o iai le tofotofoga.

Ana se mea e faaloto tatou e le Atua i le na'o lelei, ailoga i se a o se lalolagi anoa ma matalasi sona uiga? Ailoga foi tatou te alolofa moni i le na faia i tatou?

E tula'i mai ai le fesili, O fea e afua mai ai le leaga, poo le naunauga e fai le agasala? Fai mai lesu e sau le leaga mai totonu. E mafua ai le upu a le poto, ia sili ona leoleoina le lotu, auā e tupu mai ai le amio.

Manatua nai 'vaivaiga' na tatou te maua uma ai lava, lea e faaigoa e nisi o tamai u fanafana a le tevelo—le uiga faitogafiti, le talapelo e le uma, le lafo o upu so'ai e manu'a ai lotu o nisi, e foliga e mamā ae leai, le fetuu ma le lotoleaga. E leai se mea ta'uleleia i lona lisi. A ua talia lava o ni vaegamea o lo tatou fausaga. E foliga a leai na mea i se tagata o lona uiga e le o se tagata atoa. E vave ona tusilima i le Tiapolo i nisi taimi. E foliga o soo se mea leaga e tupu e mafua lava ona o le Tiapolo.

E iai se tala e faatatau tonu i se feuma'iga a Satani ma le Atua. Ina ua tuua'i e se Kerisiano le tiapolo i lona agasala na fai, ona alu lea o Satani i luma o le Atua e molita'i le Kerisiano lea. Na 'ata le Tiapolo ma faapea atu i le Atua, 'Fai atu foi, e le se fausaga lelei lenei na e fai? Ana leai nei a'u, o ai e tapa i ai?'

Afai la o le lotu—poo totonu e afua mai ai le lelei ma le leaga, ona foliga mai lea o se taua e lata mai le tafa o loo tau ai. O le aufaatuatua o fitafita, a o le faaalei'auga e mai le lagi ma Ana afioga. O le mau lea a Kerisiano. Ua valaauina Kerisiano e tetee atu i le leaga, e lē i aupega a tagata a o aupega faaleagaga. Finau mai Paulo.

E malie se tala i se loomatua na tatalo i le Atua e lavea'i le Tiapolo. O lona manatu a lavea'iina le Tiapolo ona le toe iai lea o se leaga i le lalolagi. Auā o lona taofi o le faapogai lea o tiga, ma puapuaga ma mafatiaga.

E malie ma fa'aataata lafoga le tatalo a le loomatua, ae o le mea moni e le faigata i le Atua ona fai; auā o ia o le Atua. O le fesili, Ana fai e gaua'i le finagalo o le Atua fai le mea o loo mana'o ai le loomatua, ona a lea? Pe toe aoga ona talanoa nisi i ni lelei ma ni leaga? Poo se foafoaga na'o mamoe e aunoa ni 'oti ulavavale—e iloa ai o se foafoaga uigalasi? Pe atagia ai se Atua e alofa moni i lona foafoaga? Ailoga. Aemaise foi, e le o le Atua lona i lona uiga moni, e le o se e faalialiavale i lona Mana.

E tatau ona iai se mafuaaga. E tatau ona iloa e le lalolagi lea mafuaaga, la lea e tatau ona iai se tauiviga. E a le tauiviga? E tatau ona iai se Fili, o lona na liutino i le igoa o Lusifelo, Satani i le mau a lutaia. O le a le taunuuga? Lea na faatini e lesu i luga o le satauro.

Afai na uluai silafia e le Atua o loo sauni le Tiapolo e fai sana vaega i Lana Fuafuaga Tele (faailoaina o lona alofa), e sala la ina tuua'i e le Alii lona maliu i tagata na faia le faasala, i latou na sa tauemu ma tausui; na mafua ai lona olega i lona Tamā e faamagalalo i latou, auā ua latou le iloa le mea ua latou fai.

Afai ua faafitia le Lelei (Iesu) ina ia ola le Leaga (Parapa), tuuavanoa le Atua lava ia i le pule a le pogisa (luta, ta'ita'i o le lotu lutaia ma le malo o Roma) ina ia faaalua ai le mata'utia o lona mana, o ai e fesiligia ona ala? Pe le o le mea ea lona na auina mai ai lona Alo i le lalolagi, ina ia faalelei le mea ua leaga? Ae tatau ona iai muamua se leaga e faalelei.

O se luitau mo le lotu Kerisiano le molita'iina pea o se talitonuga i se Atua Malosi e pei ona iloa e lopus ma lona tupulaga. E to'atele talavou i nei aso latou te le talia se ata o se Atua faivavega i le malamalama o mea moni faasaienisi. Le tuua'iina o se meafaiola (poo se ata i le mafaufau e aofa'ia ai leaga) i puapuaga ma mafatiaga o le lalolagi, le tala'iina pea o sea ata i se Atua malosi tainane o se Atua e le tali mai i mafatiaga o le lalolagi. Le Atua e foliga e tu mamao mai i mea o loo tutupu i le ola o tagata i aso faisoo.

Ua siliga se na auala. Auā e le pei tala uma o le tala ia lopus, na toe faafoisia ia te ia ana mea uma, ma foliga mai ai o se tasi fagogo a tamaiti e manaia lona faaiuga—e pei lava o iuga o fagogo uma. Ae e le faapena le tulaga moni o le olaga mo le tele o tala o loo tatou faitau i ai, tofo i ai, ma molimauina.

E faapena foi se ata o loo tauaveina e le to'atele i le afuaga ma le faapogai o le leaga, lea ua faaperesonaina— o lē o loo Leaga, Satani, Tiapolo ma isi igoa ua faaigoa ai. E foliga ua maua ai se 'alofaga i le tagata e faanoi ai i lona vaivai. A o aga'i ina faatetele le amio leaga a le lalolagi, o le atili leaga foi lona o le Tiapolo i manatu o le to'atele.

Ua manino le fe'au a le Tiapolo i le molimau a le Tusi Paia, o le faaosooso, e pei ona fai i le ulua'i tagata, o lē na auala ai le tofotofoga e pei ona fai ia lopus.

E tatau foi ona manino le pitolaau a le tagata i lenei finauga. Fai mai le Lotu lutaia o le filifiliga i magaala e lua.

Faaauau i le itulau mulimuli



Sponsored by Evaleon Books

O LOU TALA SAMOA HISTORY

"Ne'i mea ane na galo"



27MAT—02APE

27 MATI

2003 TNS. Savalia palemene a Niu Sila e le Mau Sitiseni ma le talosaga e toe sui le tulafono na faaleaogaina sitiseni o Samoa, iuga mai Peretania

1942 Taunuu i Apia le USS *President Garfield* ma le Vaega'au lona 7 a Malini Meleke

28

2010 Hong Kong. Toe malo Samoa Taito'afitu ia Niu Sila, 24-21

1993 Hong Kong. Malo Samoa Taito'afitu ia Fiti, 14-12

1979 Toe filifilia Tupuola Efi ma palemia, 24 i le 23 a Vaai Kolone

1903 Taunuu uluai vaega alii Saina i Samoa, 289

29

1966 Faatau atu tusiupu a G.B. Milner Samoa-Peretania

31

2006 Palota a Samoa. Malo HRPP, 30-49 nofoa

01 APERILA

2008 Ulufale Su'a W. Sio palemene Niu Sila

1959 Tatala le Faletupe a Samoa i Sisifo (BWS)

1899 Taua i Vaialele, va o le malo ma le itu tetee

MATI I LE TALA FAASOLO O NIU SILA

29 Mati 1959. O le 41 tausaga o le faievagelia o Billy Graham na ia asia ai Niu Sila. E fitu aso o lana tala'iga i Aukilani, na auai se 160,000, asia foi Ueligitone (60,000) ma Kalaiasetete (133,000). Niu Sila i lena taimi sa na o se 0.5 % e leai se taofi lotu, taimi nei ua 42% e le lolotu pe iai se taofi lotu. O loo soifua pea le alii faievagelia, aulia lona 97 tausaga o le soifua.

Ni vaai mai le tala faasolo o Saina i Samoa i ata:

1. Se alii Saina ma lana amoga, se vaai sa masani ai e le'i mamao atu le taimi. Sa faatau savali a latou fualaau faimea'ai i le auala.
- 2 & 3. Vaai i tiute masani i faatoaga i le gaosiga o le popo mago.

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING




Telefoni (09) 269-6186. Emeli: evaleon.books@gmail.com

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.

Sponsors:

New Zealand Lottery Commission

Evaleon Books & Niupac Publishing





PASI ATU LA
TATOU PULETINI
I LE TOU A'OGA,
AIGA, LOU TUAOI,
AU UO, OU AIGA
I SAMOA MA NUU
MAMAO;



E AOGĀ MO LE
FANAU A'OGA

HANS CHRISTIAN ANDERSEN



Tusitala, fatuupu. Soifua a'e i Tenemaka. Aso fanau, 2
Aperila 1805. E sili ona manatua e le lalolagi i ana tala
faafagogo e fiafia i ai tamaiti, i lo isi ana tusitusiga. O nei
tala na tusia i lana gagana ma liliuina i isi gagana laasia se
125 a le lalolagi. E iai ana tala ua liliuina foi i le gagana
Samoa e pei o le *The Snow Queen*, *The Emperor's New Coat*,
The Nightingale, ma isi e tele. O ia se tasi o tusitala alofagia
a tamaiti i soo se tulimanu o le lalolagi.

ATI A'E UPU

ta'uamiotonuina. Vasega: veape. (ta'u + amiotonu -ina) Uiga. Ta'u se amio ua tonu. (faalelotu) Ua ta'uuleleia le tagata agasala i le amiotonu a le Atua; tainane e leai sana amio ua tonu pe sa'o. Isi upu: tusa'oina, ta'uuleleia, faasa'oina e le tulafono, ta'uamiotonuina i le maliu o Keriso.

O le tasi i le Manuia, o le isi i le Malaia. E pa'u le uluulu o le laau i le tagata ae le o le Tiapolo. E pei o Iopu, sa tofotofoina ae le'i toilalo ai, auā na sa'o lana filifiliga.

Ua talanoa le to'atele o le aufaitofa i le tatau ona faailoa se ata fou o le Atua e sui ai lena o loo taumau pea i ai; e le o le ata o se Tamaloa Maoa'e e fai sona ofulele, a o le ata o se Atua Auauna i se tagata e pei o se tasi o i tatou, lea e molimoli mai i le fe'au o le Eseta.

Le auauna e le ese mai i le isi tagata, le tuaoi, o se e vaivai ma tofotofoina. E iai ma lotolotoi i le faapotopotoga, e auala lona mana i tomai ma agavaa o le foma'i, le matai le failotu le fatuupu le faipule. I lena ata e iloa atu ai i latou e aupito itiiti ma faatauva; i le olaga mativa, pagatia o loo ola ai isi. (O a'u lena ua outou faia i ai); i tulaga o le olaga e tofotofoina ai le faamaoni o la tatou tali atu (tautua) i le Atua ma lona finagalo (O ese atu ia, ou te le iloa outou).

I le feau o le Eseta e iai le malosi i le vaivai, le manumalo tainane le oti. Lena ata o le Emanuelu liutino ua auai ma i tatou i le mafaufau ma le loto gatasitasi – e faia Lona finagalo i le lalolagi, e pei ona faia i le lagi.

O tatou o ona aao, o lona agaga ma le mafaufau, o ana fitafita e molia le taua faasaga i le leaga poo fea lava a o a foi foliga e liutino mai ai.

I nei aso ua avea pulega malo ma faalapotopotoga ma pisinisi tetele o ni liutinoga o leaga i le lalolagi; e ala ia latou filifiliga faapito ua avea ma auala o tiga ma mafatiaga i le to'atele. Ae le tatau ai ona faavaivai le finau i ala o le filemu, auā o le finagalo lena o le Matai mo tatou. Avea tatou ma faaa'oa'o i le lelei, o ni moli i le pogisa, i lou nuu ma le mea e au i ai lau pule. E pei ona malie le upu a se fatusolo, e pau le mafuaaga e saga tupu tele ai le leaga i le lalolagi, o le leai o se mea e fai i ai a ē lelei.

Afai ua tatou sauni e talia le Alii i ana upu, ona tatou talia foi lea o la tatou pitolaau i le finauga mo le manumalo a'ia'i o lelei.

E faaiu atu ai se manatu e faapea, E iai lo tatou tiute i le faamatalaina o lena fāiā a lelei ma leaga mo fanau tutupu a'e. E iai le leaga i totonu e ao ona utagia ma maloina. E ao ona tatou talia tiga o le ola ma tali atu i ai mo e ua tigaina, o lima ma vae o lo tatou Alii.

Le taua o filifiliga lelei tatou te fai mo le manuia lautele. Le lototele e tusi ai o tatou lima ia i tatou lava. Ma tatou tatalo pea ma le lotomaulalo i le tatalo na la a'oa'o mai, ia e lavea'i ia i matou 'ai le leaga, auā matou te le mafaia se mea e aunoa ma Lou mana.